

VOKATRA FANONDRANA

Tafakatra 4.800.000 Ar any, ny lavanila masaka any ivelany

24000 Ar eo ny vidina singana lavanila iray, na gousse de vanille iray any ivelany. Arak'izany, lafo vidy tokoa ity vokatra fanondrana amin'ny mam-palaza an'i Madagasikara ity any ivelany, ny vidin'izany vokatra izany eny amin'ny tantsaha mpamokatra eto amintsika anefa dia azo lazaina ho ambany ihany, satria noferan'ny fitondrana ho 70000 Ar ny vidin'ny iray kilao, amin'ny faritra sasany aza anefa, mora lavitra noho izany ny vidiny: 20000 Ar, na tafidina hatramin'ny 15000 Ar akory aza. Arak'izany, mahazo



tombony be tokoa ny mpanondrana ity vokatra fanondrana ity eto amintsika, raha tarafina amin'io vidina lavanila singany iray io. Ny 1 kg lavanila maitso dia ahitana voana lavanila 36 ka hatramin'ny 40. 5 kg lavanila

maitso anefa no hahazoana 1 kg lavanila masaka, noho izany ny lavanila masaka 1 kg mety misy voany na singana lavanila 180 ka hatramin'ny 200 isa. Eo amin'ny tsena iraisam-pirenena noho izany, ny la-

vanila masaka 1 kg dia mety hahazoana hatramin'ny 4,8 tapitrisa Ar ny vidiny na 4.800.000 Ar eo. 250 dolara no lazain'ny mpitondra eto amintsika fa vidiny any ivelany, nefa raha io kajy sy zava-misy io dia tafakatra hatramin'ny 1200 dolara amerikana any ny vidin'ny lavanila masaka eo amin'ny tsena iraisam-pirenena. Misy tombony mihoa-pampana be lasan' ireo mpandronana, nefa ny tantsaha tena mpamokatra tsy mahazo izay tombontsoa tokony ho azo amin'ity vokatra fanondrana ity izay.

Aly

Ikkongo Voafonja miisa 120 mahery mbola tsy tafaverina

Voafonja miisa 125 hatramin'izao no mbola tsy tafaverina ao amin'ny fonjan'Ikongo any amin'ny faritra Fitovinany. Tsy vaky akory ny fonja ny alatsinainy teo, fa tsy nisy mpiambina intsony izany toeram-pigadrana tany an-toerana izany, satria lasa nandositra avokoa ny mpitandro filaminana sy ny mpiandry fonja, noho ny korontana tany an-toerana, ka nahafatesana olona miisa 20 mahery. Hatramin'ny omaly, miisa 50 kosa ireo gadra niverina amin'ny nahimpony ao amin'ity fonja any



an-toerana ity. Amin'izao fotoana izao, azo lazaina ho efa miverina amin'ny laoniny ny filaminana ao

amin'ny renivohitr'ity distrika ity, tonga tany an-toerana ny tompon'andraiki-panjakana, ary efa

niverina koa ireo mpitandro filaminana sy ireo mpiasan'ny fitsarana, efa nisy koa ireo mpitandro filaminana fanampiny, na renfort. Simba noho ny rivo-doza nandalo farany teto amintsika ireny ny fonjan'Ikongo, ny tranon'ny fizahantany any an-toerana no mandray ireo voafonja ireo ankehitriny, ny fefy dia fefy fanitso fotsiny, koa tsy nahagaga raha nivoaka niala tao ireo voafonja, satria tsy nisy mpiambina koa tao aorian'ny savorovoro ny alatsinainy teo iny.

Stefa

Amirale Van Alexandre Miantso ny fianakaviambe iraisammpirenena handray andraikitra

Malagasy tanora mila ravinahitra any Frantsa Amirale Van Alexandre no maneho ny heviny manoloana ny vono olona nitrangana tany Ikongo

tra ny tongotra ka niova ny fandeha raha nahare ny zava-miseho fa Malagasy mitovy amin'ny tena efa 26 no namoy ny ainy tao Ikongo. Misy ny fanajana ny aina izay zo faratampony amin'ny zo ananan'ny olombelona rehetra eto Madagasikara

izay ny lalana iraisam-pirenena no milaza sy mametraka izany. Ka noho izany dia miantso ny fianakaviambe iraisammpirenena sy ireo rafitra iraisam-pirenena rehetra mba hijery sy handray andraikitra aingana dia aingana amin'izao zava-nitranga

mahatsiravina izao eto amin'ny firenena izao Ny tenako kosa hoy Amirale Van Alexandre dia miondrika ampanajana eo anatrehan'ireo namoy ny ainy ary mirary fahasalamana ho an' ireo naratra mafy rehetra.

Helisoa

Fiangonana Jesosy Mpamonjy eto Madagasikara Nankalaza ny faha-30 taona nijoroany

Natao tamin'ny asabotsy 27 sy alahady 28 aogositra 2022 lasa teo teny amin'ny kianjan'i Benasandratra ao Fenoarivo ny fankalazana ny faha-30 taona nijoroan'ny Fiangonana Jesosy Mpamonjy teto Madagasikara ka fotoam-bavaka nandritran'ny 2 andro no nanamarihana an'izany; Ny andro voalohany dia fitorianteny notarihan'i Pastora Rakotovao Jean Pierre avy any Mahajanga izay filohan'ny fikambanana Mpitandrina ka namelabelarana ny lohahevitra : "Ny fitiavan'Andriamanitra

antsika sy ny tokony hifankatiavantsika" izay nalaina tao amin'ny I : Jaona 4/8. Tamin'ny tapany hariva kosa dia i Pastora Rakotonirina Edmond avy any Miarinarivo no nitriteny ka ny lohahevitra tamin'io indray dia : "Ny fomba hahazoan'ny olona ny famonjena , ka handovany ny fiainana mandrakizay" nalaina tao amin'ny I Petra 1-9, sy Mat 1/21. Nisy ny fijoroana vavolombelona tamin'ny fanasitranana nataon'ny Tompo tamin'ireo mpino taorian'izany. Tamin'ny alahady 28 aogositra 2022

no famaranana , ka ny Pastora Ratsimanosika Jean Emile avy ao Soavimansoandro no nitondra ny tenin'Andriamanitra. Ny "fijorona amin'ny fanompoana an'i Tompo" no lohahevitra nanompanana ny toriteny tamin'izany izay nalaina tao amin'ny Daniel 3/16-18 dia ny tsy naneken'i Sadraka sy Mesaka ary Abednego ny hiankohoka tamin'Andriamanitra volamena izay nataon'i Nebokadnezar. Nisy ny firahan'ny daholobe nahitana ny solontenan'ny lafivalon'ny Nosy nisakafo avy eo nane-

Rainilita

Fampianarana ambony Mitroatra indray ny mpianatra eny Vontovorona

Migrevy sy mitroatra indray ny mpianatra eny amin'ny Universite polyteknika eny Vontovorona Antananarivo Atsimondrano amin'izao fotoana. Nisy ny hetsika fanakanan-dalana, sy tora-bato ary fifandonana tamin'ny mpitandro filaminana tamin'izany. Mitaky ny vatsim-pianaran'izy ireo mbola tsy azo ireto mpianatra ireto, misy koa ireo mbola tsy nahazo mihitsy izany vatsim-pianarana izany, na efa nanao fanitsiana sy fitarainana tamin'ny tompon'andraikitra aza izy ireo. Fitondrana variana amin-javatra hafa sy rendrarendra izao fitondrana Rajoelina izao, fa tsy mijery izay tena olam-ba-haoka sy ny olan'ny mpianatra, ny olan'ny mpiasa samihafa, koa tsy mahagaga raha tsy voaloany toy izao hatrany ny volan'olona. Mbola mitoetra hatrany hatreto ny filazana izao fitondrana Rajoelina izao hoe: "fitondrana tsy mahaloa, na tsy mpandoa volan'olona."

Isambilo



Fitateram-bahoaka: Any akibon'ny omby ny bus 1000

Fiara fitaterana 1000 isa hono higidona hiasa eto Antananarivo aoriana kely ao, izay soritina fa fiara varenty mahazaka mpandeha 50 mitondra olona mipetraka sy mitsangana toy ireny minibus taloha ireny. Nefa raha ny feo azo teny rehetra teny dia marobe no tsy mankasitraka , hoy ireo mpamily sendra anay . Dia hanao ahoana ireto taksibe miasa marobe ireto?, mba mifanaraka amin'ny lalana eto an-toerana sy ny hamaroan'ny fiara sy moto mifamezivezy eto andrenivohitra ve izany?, ny taxi moa efa mitsipaka ny taxi-moto, ny taksibe koa efa manipy feo, satria mety ho ela ary sahirana vao tafavoaka amin'ny anjara lalana iray raha ny haben'ny fiara miasa no jerena. Tany aloha raha nisy ny fiara FIMA sy FIBATA , dia mazava fa mbola vitsy an'isa ireo fiara madinika sy moto mifamezivezy Ankehitriny raha hitombo arivo isa ny fiara fitateram-bahoaka dia hanao ahoana ny fitohanana etsy sy eroa? Ny mpandeha sasantsasany koa efa nilaza fa na ny Bus-class aza fanehoana hambo sy werawera fotsiny tany am-boalohany, satria ny saran-dalana izay noheverina fa hanampy tamin'ireny fotoana ireny tonga dia avo telo heny ny vidin'ny seza iray na lavitra na akaiky ny lalan-kaleha. Ireto fiara fitaterana mitondra mpandeha mitsangana moa dia mbola tsy fantatra hoe: Ohatrinona mazava ny sarany iray?. Mbola any akibon'ny omby moa izany fa vinvainaina fotsiny io nofinofin'ny mpitondra hampiditra bus 1000 eto Antananarivo io.

Beharo